

## 《佛說優婆塞五戒相經》<sup>1</sup>殺戒

### 甲一、釋經題

#### 乙一、法題

#### 乙二、譯主

### 甲二、釋經文

#### 乙一、敘啓分

##### 丙一、六種成就

##### 丙二、請法緣起

#### 乙二、正說分

##### 丙一、殺戒<sup>1</sup>

###### 丁一、三種奪人命

###### 丁二、興殺方便

###### 戊一、用內色、非內色、內非內色

###### 戊二、合諸毒藥

###### 丁三、廣標種種殺方便

###### 戊一、十四種殺

###### 己一、無煙火坑殺

###### 己二、厭禱殺

###### 己三、墮胎殺

###### 己四、按腹殺

###### 己五、惡道中殺

###### 己六、迦羅邏時殺

###### 己七、讚歎殺

###### 己八、餘七同上火坑

###### 丁四、境想

###### 丁五、料簡

###### 戊一、聽議殺

###### 戊二、誤、本心、失戒體

###### 戊三、轉想

###### 戊四、惡心瞋恨

###### 戊五、境差或心差

###### 戊六、用蟲水

###### 丁六、開緣（無殺心）

###### 戊一、不小心、怖畏、誤

###### 戊二、破癰、擊攢、喚死

---

### <sup>1</sup>具緣成犯

◎《五戒相經箋要》：殺戒以五緣成不可悔：一是人（謂所殺者人，非畜生等），二人想（謂意在殺人），三殺心，四興方便，五前人命斷。

◎《事鈔》：殺人戒犯緣具五：一是人，二人想，三起殺心，四興方便，五命斷。

## 甲一、釋經題

### 乙一、法題

佛說優婆塞五戒相經

### 乙二、譯主

宋元嘉年求那跋摩譯

## 甲二、釋經文

### 乙一、敘啓分

#### 丙一、六種成就

聞如是，一時佛在迦維羅衛國。

#### 丙二、請法緣起

爾時淨飯王來詣佛所，頭面禮足，合掌恭敬，而白佛言：「欲所請求，以自濟度。唯願世尊哀酬我志！」佛言：「可得之願，隨王所求！」王白佛言：「世尊已爲比丘、比丘尼、沙彌、沙彌尼，制戒輕重，唯願如來亦爲我等優婆塞分別五戒可悔、不可悔者，令識戒相，使無疑惑！」

佛言：「善哉，善哉，僑曇！我本心念，久欲與優婆塞分別五戒。若有善男子受持不犯者，以是因緣當成佛道。若有犯而不悔，常在三塗故。」

爾時佛爲淨飯王種種說已，王聞法竟，前禮佛足，遶佛而去。佛以是因緣告諸比丘：「我今欲爲諸優婆塞說犯戒輕重可悔、不可悔者！」諸比丘僉曰：「唯然，願樂欲聞！」

### 乙二、正說分

#### 丙一、殺戒

##### 丁一、三種奪人命

佛告諸比丘：「犯殺有三種奪人命：一者，自作；二者，教人；三者，遣使。自作者，自身作奪他命；教人者，教語他人言：「捉是人，繫縛奪命。」遣使者，語他人言：「汝識某甲不？汝捉是人，繫縛奪命。」是使隨語奪彼命時，優婆塞犯不可悔罪。

##### 丁二、興殺方便

###### 戊一、用內色、非內色、內非內色

復有三種奪人命：一者，用內色；二者，用非內色；三者，用內非內色。內色者，優婆塞用手打他，若用足及餘身分，作如是念：「令彼因死！」彼因死者，是犯不可悔罪；若不即死，後因是死，亦犯不可悔；若不即死，後不因死，是中罪可悔。用非內色者，若人以木、瓦、石、刀稍、弓箭、白鐵段、鉛錫段，遙擲彼人，作是念：「令彼因死！」彼因死者，犯不可悔罪；若不即死，後因是死，亦犯不可悔；若不即死，後不因死，是中罪可悔。用內非內色者，若以手捉木、瓦、石、刀稍、弓箭、白鐵段、鉛錫段、木段打他，作如是念

：「令彼因死！」彼因死者，是罪不可悔；若不即死，後因是死，亦犯不可悔；若不即死，後不因死，是中罪可悔。

### 戊二、合諸毒藥（以毒藥爲興殺方便）

復有不以內色，不以非內色，亦不以內非內色，爲殺人故合諸毒藥，若著眼、耳、鼻身上瘡中，若著諸食中、若被褥中、車輿中，作如是念：「令彼因死！」彼因死者，犯不可悔罪；若不即死，後因是死，亦犯不可悔罪；若不即死，後不因死，是中罪可悔。

### 丁三、廣標種種殺方便

#### 戊一、十四種殺

復有作無烟火坑殺他、核殺、弼殺，作奔殺、撥殺、毘陀羅殺、墮胎殺、按腹殺，推著火中、水中，推著坑中殺，若遣令去就道中死，乃至胎中初受二根（身根、命根）於中起方便殺。

#### 己一、無煙火坑殺

無煙火坑殺者。若優婆塞知是人從此道來，於中先作無煙火坑，以沙土覆上，若口說：「以是人從此道來故，我作此坑。」若是人因是死者，是犯不可悔罪；若不即死，後因是死，犯不可悔罪；若不即死，後不因死，是中罪可悔。爲人作無煙火坑，人死者不可悔；非人死者，是中罪可悔；畜生死者，下罪可悔。爲非人作坑，非人死者，是中罪可悔；人死，是下罪可悔；畜生死者，犯下可悔罪。若爲畜生作坑，畜生死者，是下罪可悔；若人墮死、若非人墮死，皆犯下罪可悔。若優婆塞不定爲一事作坑，諸有來者，皆令墮死，人死者，犯不可悔；非人死者，中罪可悔；畜生死者，下罪可悔；都無死者，犯三方便可悔罪。是名無煙火坑殺也！

#### 己二、厭禱殺（咒術斷命）

##### 庚一、毗陀羅（召鬼咒屍）

毗陀羅者，若優婆塞以二十九日，求全身死人，召鬼、咒屍令起，水洗著衣，令手捉刀，若心念口說：「我爲某甲故，作此毗陀羅。」即讀咒術。若所欲害人死者，犯不可悔；若前人入諸三昧，或天神所護，或大咒師所救解，不成害，犯中可悔。是名毗陀羅殺也。

##### 庚二、半毗陀羅（召鬼咒鐵人）

半毗陀羅者，若優婆塞二十九日作鐵車，作鐵車已，作鐵人，召鬼，咒鐵人令起，水洗著衣，令鐵人手捉刀，若心念口說：「我爲某甲讀是咒。」若是人死者，犯不可悔罪；若前人入諸三昧，諸天神所護，若咒師所救解，不成死者，是中罪可悔。是名半毗陀羅殺。

##### 庚三、咒死（種種咒）

斷命者，二十九日牛屎塗地，以酒食著中，然火已，尋便著水中，若心念口說，讀咒術言：「如火，水中滅，若火滅時，彼命隨滅。」又復二十九日牛屎塗地，酒食著中，畫作所欲殺人像，作像已，尋還撥滅，心念口說，讀咒術言：「如此像滅，彼命亦滅，若像滅時，彼命隨滅。」又復二十九日牛屎塗地，酒食著中，以針刺衣角頭，尋還拔出，心念口說，讀咒術言：「如此針出，彼命隨出。」是名斷命。若用種種咒死者，犯不可悔罪；若不死者，是中罪可悔。

### 己三、墮胎殺（方法針對胎）

又復墮胎者，與有胎女人吐下藥，及灌一切處藥，若針血脈，乃至出眼淚藥，作是念：「以是因緣令女人死。」死者，犯不可悔罪；若不即死，後因是死，亦犯不可悔罪；若不即死，後不因死，是中罪可悔。若爲殺母故墮胎，若母死者，犯不可悔；若胎死者，是罪可悔；若俱死者，是罪不可悔；若俱不死者，是中罪可悔。若爲殺胎故，作墮胎法，若胎死者，犯不可悔；若胎不死者，是中罪可悔；若母死者，是中罪可悔；俱死者，是犯不可悔。是名墮胎殺法。

### 己四、按腹殺（方法針對母）

按腹者，使懷妊女人重作，或擔重物，教使車前走，若令上峻岸，作是念：「令女人死。」死者，犯不可悔；若不即死，後因是死，是罪不可悔；若不因死者，是中罪可悔。若爲胎者，如上說，是名按腹殺也。

### 己五、惡道中殺

遣令道中死者，知是道中有惡獸飢餓，遣令往至惡道中，作如是念：「令彼惡道中死。」死者，犯不可悔；餘者亦犯，同如上說。是名惡道中殺。

### 己六、迦羅邏時殺（胎中初七日位，墮胎）

乃至母胎中初得二根，身根、命根迦羅邏時，以殺心起方便，欲令死。死者，犯不可悔；餘犯，同如上說。

### 己七、讚歎殺（教自殺）

讚歎殺有三種：一者，惡戒人；二者，善戒人；三者，老病人。

#### 庚一、惡戒（惡不如早死）

惡戒人者，殺牛羊，養雞豬，放鷹捕魚，獵師圍兔、射麀鹿等，偷賊魁膾，咒龍守獄，若到是人所，作如是言：「汝等惡戒人，何以久作罪？不如早死！」是人因死者，是罪不可悔；若不因死者，是中罪可悔。若惡人作如是言：「我不用是人語。」不因是死，犯中可悔罪。若讚歎是人令死，便心悔，作是念：「何以教是人死？」還到語言：「汝等惡人，或以善知識因緣故，親近善

人，得聽善法，能正思惟，得離惡罪，汝勿自殺。」若是人受其語不死者，是中罪可悔。

### 庚二、善戒（福何不奪命）

善戒人者，如來四衆是也。若到諸善人所，如是言：「汝持善戒有福德人。若死，便受天福。何不自奪命？」是人因是自殺死者，犯不可悔罪；若不自殺者，中罪可悔。若善戒人作是念：「我何以受他語自殺！」若不死者，是罪可悔。若教他死已，心生悔言：「我不是！何以教此善人死？」還往語言：「汝善戒人，隨壽命住，福德益多故，受福益多，莫自奪命。」若不因死者，是中罪可悔。

### 庚三、老病（苦何不奪命）

老病者，四大增減，受諸苦惱，往語是人言：「汝云何久忍是苦，何不自奪命？」因死者，是罪不可悔；若不因死者，是中罪可悔。若病人作是念：「我何緣受是人語，自奪命？」若語病人已，心生悔：「我不是！何以語此病人自殺？」還往語言：「汝等病人，或得良藥，善看病人，隨藥飲食，病可得差，莫自奪命！」若不因死者，是中罪可悔。

### 己八、餘七同上火坑

餘上七種殺，說犯與不犯，同如火坑。

### 丁四、境想

若人，作人想，殺，是罪不可悔。人，作非人想，殺；人中生疑；殺，皆犯不可悔。非人，人想，殺；非人中生疑，殺，是中罪可悔。

### 丁五、料簡

#### 戊一、聽議殺

又一人被截手足置著城塹中，又衆女人來入城中，聞是啼哭聲，便往就觀，共相謂言：「若有能與是人藥漿飲，使得時死，則不久受苦。」中有愚直女人，便與藥漿，即死。諸女言：「汝犯戒不可悔。」即白佛，佛言：「汝與藥漿時死者，犯戒不可悔。」

#### 戊二、誤、本心、失戒體

若居士作方便欲殺母，而殺非母，是中罪可悔。若居士欲殺非母而自殺母，是犯中罪可悔，非逆。若居士方便欲殺人，而殺非人，是中罪可悔。若居士作方便欲殺非人，而殺人者，犯小可悔罪。若人懷畜生胎，墮此胎者，犯小可悔罪。若畜生懷人胎者，墮此胎死者，犯不可悔。若居士作殺人方便，居士先死，後若有死者，是罪犯可悔。

#### 戊三、轉想

殺父母，心生疑：「是父母非耶？」若定知是父母，殺者，是逆罪，不可悔。若居士生疑，是人、非人？若心定知是人，殺者，犯不可悔。

#### 戊四、惡心瞋恨

若人捉賊，欲將殺，賊得走去，若以官力，若聚落力，追逐是賊。若居士逆道來，追者問居士言：「汝見賊否？」是居士先於賊有惡心瞋恨，語言：「我見在是處。」以是因緣，令賊失命者，犯不可悔。若人將衆多賊欲殺，是賊得走去，若以官力，若聚落力，追逐。是居士逆道來，追者問居士言：「汝見賊否？」是賊中，或有一人是居士所瞋者，言：「我見在是處。」若殺非所瞋者，是罪可悔；餘如上說。

#### 戊五、境差心差或不自憶念

若居士，母想，殺非母，犯不可悔，非逆罪。若戲笑打他，若死者，是罪可悔。若狂，不自憶念，殺者，無罪。

#### 戊六、用蟲水

若優婆塞用有蟲水及草木中殺蟲，皆犯罪。若有蟲，無蟲想，用亦犯。若無蟲，有蟲想，用者亦犯。

### 丁六、開緣（無殺心）

#### 戊一、不小心、怖畏、誤

有居士起新舍，在屋上住，手中失梁墮木師頭上，即死，居士生疑，是罪爲可悔不？問佛，佛言：「無罪。」屋上梁，人力少不禁故，梁墮木師頭上，殺木師。居士即生疑，佛言：「無罪。從今日作，好用心，勿令殺人。」又一居士屋上作，見泥中有蠍，怖畏跳下，墮木師頭上，即死，居士生疑，佛言：「無罪，從今日好用心作，勿令殺人。」又，一居士日暮入嶮道，值賊，賊欲取之，捨賊而走，墮岸下織衣人上，織師即死，居士生疑，佛言：「無罪。」又，一居士山上推石，石下，殺人，生疑，佛言：「無罪，若欲推石時，當先唱石下，令人知。」

#### 戊二、破癰、擊攣、喚起

又，一人病癰瘡，未熟，居士爲破而死，即生疑，佛言：「癰瘡未熟若破者，人死，是中罪可悔；若破熟癰瘡，死者，無罪。」又，一小兒喜笑，居士捉，擊攣令大笑故便死，居士生疑，佛言：「戲笑故，不犯殺罪，從今不應復擊攣人令笑。」又，一人坐以衣自覆，居士喚言：「起。」是人言：「勿喚我，起便死。」復喚言：「起！」起便即死，居士生疑，佛言：「犯中可悔罪。」

<sup>1</sup>參考書目：《五戒相經箋要集註》

劉宋天竺三藏求那跋摩譯，明沙門智旭（蕩益大師）箋要。  
曇昉（弘一大師）校並補釋，廣化律師集註。